

Kiwanis Club of Aruba a presenta su directiva nobo pa aña 2021-2022



Recientemente e miembran di Kiwanis Club of Aruba a uni hunto na Marriott Grand Ballroom pa instala e directiva p'e siguiente aña Kiwanistico. E directiva lo tin e responsabilidad di guia y lidera e club p'asina e miembran por continua cu e bunita trabao di duna yudansa n'esnan di nos comunidad cu ta den necesidad.

E instalacion a wordo ehecuta dor di Lieutenant Governor Natalie Daal di Kiwanis Club of Piscadera, Curaçao, kende tabata di bishita na Aruba.

E directiva nobo ta consisti di: Presidente - Jokoeza Hooplot; Vice Presidente - Manaaf Badloe; Secretario - Gay Spellén; Tesorero - Norma Brinkenberg; Presidente Saliente - Ingmar Ramharakh; Directornan - Tracey Werleman, Nathalie van der Linde, Claudine Ho-Kang-You, Daniel Driessen y Nanni Larmonie.



E miembran aki a wordo instala, no solamente den presencia di tur e miembran di Kiwanis Club of Aruba, pero tambe invitadonan distingui di Kiwanis Club of Palm Beach, Kiwanis Club of San Nicolas, Kiwanis Club of Young Professionals Aruba, Quota Club of Aruba y Lions Club of Aruba. E mainta tabata uno increiblemente agradabel, danki na sr. Chris Kross kende a provee e entretenimiento, sr. Jair Versprey y sr. Jersey Isenia cu a canta e himno di Aruba y Curaçao, sra. Ariana Koolman a recita un bunita poema, y Ebby Schwengle cu e fungi como maestro di ceremonia.

E miembran a tuma un momento pa duna nan respet y honor na defunto miembran di Kiwanis Club of Aruba, Ray Farro y John Every, kendenan recientemente a fayece y conhuntamente a duna 100 aña di servicio comunitario.

E Presidente saliente, Ingmar Ramharakh, prome cu simbolicamente a traspasa su posicion over n'e Presidente nobo, a haci uzo di e oportunidad pa expresa un danki special n'e directiva saliente pa nan tremendo trabao, y tambe na, Lieutenant Governor Natalie Daal, y Lieutenant Governor saliente Patrick Melchior pa nan guia durante e aña Kiwanistico. Sr. Ramharakh a gradici su sponsors cu a introduci'e den Kiwanis Club of Aruba, esta sr. Gíantonio Muller y sra. Indra Pereira. Tambe e tabata tin un gesto di aprecio pa sra. Aurora Dijkhoff, kende tabata e prome persona pa convence pa postula su mes pa Presidente.

Sr. Ramharakh a presenta un premio di 'Rookie of the Year' na miembro nobo, Nanni Larmonie, y un premio di 'Teamwork of the Year' na un team cu su trabao a resalta: Indra Pereira, Tracey Werleman, Norma Brinkenberg, Ebby Schwengle, Gay Spellén y Nanni Larmonie.



Kiwanis ta un organisacion global cu ta consisti di miembran boluntario, dedica na mehorando mundo henter, cu un enfoke special riba muchanan cu ta den necesidad. Pa mas informacion di Kiwanis Club of Aruba, por bishita www.kiwanisclubofaruba.org